

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Qanoq illoqarfinni nunaqarfinnilu suliffissaaleqiffiusuni qarasaasiakktut attaveqaatitigut assingusutigulluunniit inuusuttunut inersimasunullu misiligutitut pikkorissartitsinernik ilinniartitseqqinnernillu neqerooruteqarsinnaanermik pilersitsisoqarsinnaanera pillugu nassuiaammik kingusinnerpaamik UPA2022-mi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Suleqatigiissitsisut)

Tunngavilersuut

Inoqatitta nunarsuaq tamakkerlugu ullaakktut suliassaqarlutik makissinnaasariaqarnissaat pisariaqarluinnarpoq.

Nunatsinni taama isorartutigisumi suliniutiginerusariaqarpavut innuttaasunut pikkorissaaqqissinnaanissat, suleriutsit sungiusaatiginissaannut kiisalu ilitsersuutigisinnaanissaannut ikiuusinnaasut innuttaasunut ajornannginnerusumik pissarsiassaasariaqarput.

Suliffissaalequarnerit ajornerpaamik kingunerisinnaavaat inuunerlunnerit, tulluusimaarutissaaleqineq, piumassuseerukkaluttuinanernerlu.

Suleriusissanut pilersaarusiorniarnernut aningaasat amerlasuut atortarpavut, kissaatigalugu ilinniarfinnik nutaanik suliffinnillu pilersitsinernik kinguneqassasut, ingammik illoqarfinni mikinerusuni aammalu nunaqarfini, taamaattumillu imatut siunnersuusiorpugut pilersaarutit oqaatsillu kusanartut timitalersorneqarsinnaalerniassammata.

Kissaatiginarsinnaavoq, ungammik nunaqarfinni illoqarfinnilu minnerusuni, pikkorissaasoqakulalerusoqalernissaa, imaluunniit ilinniaqqiffiusinnaasunik periarfissaqalerulernissaa, digital-iusumik imaluunniit nittartakktigut ingerlanneqarsinnaasunik, aammalu DVD-it isiginnaagassiat ilitsersuutit atornerisigut, USB-it periarfissallu allat nittartakkaniittut atornerisigut.

Immaqaluunniit pikkorissarnermi atuarnermiluunniit atuagassat nittartakktigut kommuunit allaffiinni aaneqarsinnaasut, oqartussalluunniit suliffeqarfiillu allat aqutigalugit pissarsiarineqarsinnaasut, assersuutigalugu soorlu Majoriaq aqutigalugu, piffiit assigiinngittut Majoriap illuuteqarfigippagit.

Piffinni assigiingitsuni takusinnaavarput ukiup ingerlanerata qanoq ilinera aallaavigalugu sulisartut suliffissaaleqilersinnaasartut, immaqaluunniit inuit sulerusussusillit pikkorissarneqarnissamilli imaluunniit ilinniartitaqqinnissaminnik amingaateqaramik sulisinnaanngitsut, pissutsit tamakku sulisinnaasoqarnerulernissaanik kingaallassaasarmata.

Oqaatsit allat pisinnaasaqarfiginerulernissaat anguniarlugu pikkorissaatitsinerit siaruarsarneqarsinnaalluarput, immaqalu aamma meeqqerinnermut, tarnikkut ikiueqqaarniarnikkut, meeqqanut pinerliisimanninnermut uppernarsaatinik piniarnermi suleriutsit allallu

pikkorissarnikkut imaluunniit ilinniartitsinikkut atortussat taamak iliornikkut siammarsarneqarsinnaammata.

Takorloorparput imarisat siammasissut eqqarsaatigineqarsinnaasut; soorlu eqqiluisaarnissamut pikkorissartitsinerit, takornarialerisutut suliffeqarfeeqqamik aallartitsiumasunut ilitersuutit, pikkorissaanerit assersuutigalugu uumasut piniakkat qanoq pitsaanagerusumik nerisassiqarineqarnissaannut suliarineqarsinnaanersut, qanorlu eqqortumik asiunaveersaartinneqassanersut tuniniarneqarsinnaaniassammata, taamak iliorluni pikkorissaatitsisinnaanikkut inoqativut nittartakkatigut imminnut ilinniartissinnaaniassammata, immaqaluunniit ilinniartinneqarnermi akunnerit amerlanngittut atorlugit, siuarsaaqqinnissamut periarfissilluarlugit.

Periarfissat amerlalluinnarput, Naalakkersuisulli immikkoortortaarfii sulinissaminnut aallaavissaqareerput nittartakaktigut ilinniartitsisinnaanikkut periarfissat pioreersut aallaaviginerisigut, suliallu taakku nuna tamakkerlugu qanoq ingerlasimanerannut misissuinikkut, kiisalu nunanit avannarlernit atlantikullu avannaani ittunit ilinniartitseriaatsinik isumassarsiorfeqarsinnaallutik, tamakku nunatsinni aaqqissoqqitatut atussallugit tulluarsorineqarpata.

Anguniartariaqarparput pikkorissaaqqinnerit pikkorissaanerillu akikinnerulersinneqarnissat, inoqatitsinnullu nunaqarfinni illoqarfinnilu minnerusuni najugalinnut pikkorissarneqarnissat ajornanninnerulersinnissat, soorlu namminneq suliffeqarfimmik pilersitserusuttoqarpat taamak iliornissaannut siunnersuisinnasunik.

Nunatsinni ungasianit ilinniartitsisinnaaneq pitsanngorsarniartigu, sumiiffigisaq qimannagu pikkorissaataasinnaasunik sapinngisavut amerliniassamamta. Taamatut oqaaseqarluta saqqummiussivugut, neriulluta siunnersuusuaq una tingulluarneqassasoq.

Aningaasarsiornikkut allaffissornikkullu namminersorlutik inuutissarsiortunut kingunissai. Suliniutissat saqqummiunnissaannut suliaqarneq allaffissornikkut A/C-itut sulisunit ukiut marluk ataallugit sivilissusilimmik suliarineqarsinnaapput, taamattaarlu ilimanaateqanngilaq aningaasartuutigineqartut annerpaamik 1.000.000 kr.-iussasut.

Aningaasarsiornikkut allaffissornikkullu namminersorlutik inuutissarsiortunut kingunissai. Soqanngilaq.

Aningaasatigut allaffissornikkullu innuttaasunut kingunissai. Soqanngilaq